



Broj: T18 0 KT 0018267 25
Brčko, 2.6.2026. godine

Optužnica potvrđena dana 05.06.2026. godine

Na osnovu člana 35 stav (2) tačka z) i člana 226 stav (1) Zakona o krivičnom postupku Brčko distrikta BiH, podižem:

OPTUŽNICU

Protiv:

B. G., rođen 1980. godine u Jajcu,

Što je:

Dana 18.1.2025. godine, oko 17.30 časova, na Bulevaru mira, Brčko distrikt BiH, upravljajući putničkim motornim vozilom marke „Mercedes - Benz“, registarskih oznaka ..., krećući se središnjom kolovoznom trakom, namijenjenom za kretanje vozila iz pravca naselja Kolobara, u pravcu raskrsnice „Kuglana“, postupio suprotno odredbi člana 28 stav (1) i (2), člana 44 stav (1), člana 50 i člana 174 stav (1) i (2) Zakona o osnovama bezbjednosti saobraćaja na putevima u Bosni i Hercegovini („Službeni glasnik BiH“ broj 6/06, 75/06, 44/07, 84/09, 48/10, 18/13, 8/17, 89/17, 9/18, 46/23, 88/23), krećući se brzinom od 60 km/h, znajući da je na tom dijelu puta brzina kretanja vozila ograničena na 50 km/h, svjestan da je u alkoholisanom stanju, vozeći s koncentracijom alkohola u organizmu od 1,57 g/kg, koje odgovara stadijumu srednjeg pijanstva, koji karakteriše zamagljena svijest i intelektualne funkcije koje su jako reducirane, pri čemu dolazi do vremenske i prostorne dezorijentacije i potpune nesposobnosti za upravljanje motornim vozilom, te svjestan da je dužan da kada se približava raskrsnici mora da vozi s povećanom oprežnošću, koja odgovara uslovima saobraćaja na raskrsnici, kao i da tokom upravljanja vozilom obrati pažnju na pješake koji se nalaze na kolovozu ili stupaju na kolovoz, te kada prilazi obilježenom pješačkom prelazu, mora da upravlja vozilom s naročitom oprežnošću i da vozi takvom brzinom da u slučaju potrebe može da zaustavi vozilo ispred pješačkog prelaza, te svjestan da u takvom stanju nije sposoban za bezbjednu vožnju i da može ugroziti javni saobraćaj na putevima i dovesti u opasnost život i tijelo ljudi na šta je pristao, dolaskom na tzv. raskrsnicu „Skver“, koja je regulisana svjetlosnim saobraćajnim znakom „Semafor“, prošao kroz uključeno zeleno vozačko svjetlo, propustivši obratiti pažnju na pješaka D. B., koji se s njegove desne na lijevu stranu kretao preko obilježenog pješačkog prelaza, u trenutku kada je na pješačkom semaforu bilo uključeno crveno svjetlo, uslijed čega je u krajnjoj lijevoj saobraćajnoj traci, gledajući iz njegovog pravca, čeonim lijevim dijelom vozila ostvario kontakt s tijelom pješaka, koji se u trenutku primarnog kontakta nalazio svojom prednje – vanjskom stranom tijela okrenutom prema dolazećem vozilu i to u raskoraku, s desnom nogom podignutom iznad tla, nakon čega dolazi do nabacivanja

njegovog tijela na prednji dio vozila, a potom i udara lijeve bočne strane lobanjskog dijela njegove glave sa prednjim vjetrobranskim staklom i stubom lijevo, a potom i „leta“ preko krova vozila, kroz vazduh i odbacivanja njegova tijela ulijevo na zelenu površinu koja dijeli saobraćajne trake, kada dolazi do struganja odnosnih dijelova tijela i udova po podlozi, pa nakon što je na prethodno opisani način povrijedio D. B., bez zaustavljanja se vozilom nastavio kretati, udaljivši se sa mjesta nezgode u pravcu raskrsnice „Kuglana“, iako je bio svjestan da ostavlja bez pomoći lice koje je povrijedio prijevoznim sredstvom kojim je upravljao, što je i htio, da bi D.B., uslijed oštećenja za po život važnih centara u moždanom stablu, na licu mjesta preminuo,

dakle, pod uticajem alkohola upravljao motornim vozilom iako je zbog toga očigledno nesposoban za bezbjednu vožnju i time prouzrokovao smrt jednog lica i kao vozač motornog vozila ostavio bez pomoći lice koje je povrijeđeno tim prevoznim sredstvom, a prouzrokovana je smrt povrijeđenog lica,

čime je učinio krivično djelo Teška krivična djela protiv bezbjednosti javnog saobraćaja iz člana 330 stav (2) Krivičnog zakona Brčko distrikta BiH u vezi sa krivičnim djelom Ugrožavanje javnog saobraćaja zbog omamljenosti iz člana 327 stav (1) Krivičnog zakona Brčko distrikta BiH u sticaju sa krivičnim djelom Neukazivanje pomoći licu povrijeđenom u saobraćajnoj nezgodi iz člana 331 stav (2) istog Zakona, a sve u vezi sa članom 54 Krivičnog zakona Brčko distrikta BiH.

****Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.****
